

# 1 JOHN

*God-are Jö jumuvë'e ahuro daruge bojamuiromo i'ovavuaajeje. Röhu ë aehu sino haho'o baeromo sa'are rovamu John-mëhu gavare jöhoje.*

<sup>1</sup> Ni'l'ivadiroho ae gemu jjië'e jiadeje. Jiadoho iae ëhi ma-jiemu jioje rovë'eje. Noro ë a hesi jöho heromo hu nosi nunëro garomo muebeli ariromo hesi dajoho nosi övëro rëhë'ëro javuë'ëro ë a hesi jöho jajivo'ië'ö. Hu God-are Jö jumuvë'e i'ovavuaaje daruge bojamuijaje aeje.

<sup>2</sup> Ëi'ovavuaaje darugoho va'orahoro huruohamu noro gavë'ëro ëhu'ëro jemë mae majëhiromo uëvarueje: Ëahuro darugoho ioro'ioremu bojamuijaje höjo. Huro Vavuohu'o gemu mae hijë'ëro nosirire rueromo ë darugoho iae röjahuijade höjo.

<sup>3</sup> Noehu garomo hejare a hesi jöho majëhijö jemëro heromo jemë'o no'o agane vaerovo'iröhëro. Noehu Vavuohu'o hesi Harihe Iesu Keriso'o agano vaerovaruehi jemë'o no'o ëhi agane vaerovo'iröhëro.

<sup>4</sup> Jemë'o no'o ë'oromo ëhuro no nimoroho avoho'iröhëro ëhuni jajivö.

*Noehu mu sisë vaejaruoho vuonugoromo ëhuro God-are ajire raromo 'iröhe jöhoje.*

<sup>5</sup> Ave jöho God-are Harihohuro majahuijamu hejë'ëro noro jemë majëhijö. God hu ma-ajemu höjo. Ramoramoho hesiroho bogohöjo.

<sup>6</sup> God hu ma-aji'emu jië'ëro ëhu'ëro no uvë'ocho: No God'ö agane vaerovarue hö uvoromo röhu ramoramore raromo jijihë'ocho ëho no sareri sareri jöe atoromo sareri sareri mue vaejaruje.

<sup>7</sup> A'i God-hu aji'ere hijajëhi noehu ëhi aji'ere raromo jijihë'ocho ëhuro no göëro göhu'ö iae agane vaerovaruje. Agane vaerovego hesi Harihe Iesu hesi köhuro nosi sisëho u'ovahuo barëjajeje.

<sup>8</sup> No uvë'ocho: No sisë bogojavuajë uvë'ocho ëho simane garaejeko God-are jö maho dë vövöbajo'eroho bogojavuajeje.

<sup>9</sup> A'i noehu nosi sisë God-are örire huruoho majahijamu hejë'ocho huro biririvoromo ma-maemu uehorovoromo muoho ma-maemu vae-jajëro jië'ëro ëhu'ëro nosi sisëho uehorovoromo vuonugoromo u'ovahuo barëjajeje.

<sup>10</sup> O no uvë'ocho: No bogo sisëho vaejë'e javuajë uvë'ocho ëho noro uvoromo ë'arujeje: God-hu uövuajoho: Jemë mu sisë vaejaruje hö uövuajoho hu ma-sareramuiromo ë jöho jövaje höjo. No ëhi uvë'ocho God-are jöho nosi dë vövöbajo'eroho bogojajeje.

## 2

<sup>1</sup> Nasi aboji harihu'e ave jö naehu jemesi örire jajivaje hesi bëhoho jemë mu sisëho bogo vae'irarijeko ëhuni jajive. Röhu mu sisë vaejë'ocho

Iesu Keriso a maëro jië'ëro nosi sisëho ajamuijajeje. Ajamuiromo Vavu hesi örire jöe majahijajeje.

<sup>2</sup> Hu guomadohuro ëhuro nosi sisëho mu'uvahuoromo God-are vöröho sanuamijego God-ro nosi sisëho uehorovoromo vuonugajeje. Röhu bogo nosi sisënioho gemu guomoli sa'ae aho'obëhe dinö'e dinö'e raromarue aribövi jabesi sisëni guomadeje.

*God-hu bojamuade jögore aho'o röhu ö mueno'e uehorovëvo'iröhe jögoru ejahoromo ëhuro ajire raromo'iröhe jöhoje.*

<sup>3</sup> Röhu ave jöho uehorovoromo ëhuro uvarueje: No God gavarue höjo. No huhu bojamuade jögoru ejahë'ohuro ëhuro iae no hu gavarueje.

<sup>4</sup> Ae rahu uvë'oho: Iae na God gavaje hö uvoli röhu God-are jögoru bogo ejahë'oho ëho hu masarerivoromo ëhioho uvajeje. God-are jö maho hesi dë vövöbajo'eroho bogoje.

<sup>5</sup> O God-are jö ejahë'oho ëhuro hu God-are örire hesi dë vövöbajo'e aho'o uehorovo avohajeje. Röhu ave jöho uehorovoromo ëhuro uvarueje: No God'o gemuoro javuajëjo.

<sup>6</sup> Ae rahu uvë'oho: Na God'o gemuoro jevajë uvë'oho Iesuhu hibe juvadëhi ëhi hi'ë'e.

<sup>7</sup> Aganomë na jemesi öriroho bogo jögoru i'oho jajivo'i a'i jögoru mamioho jajivo'ië'e. Aevoromo Keriso-are jöho heromo ave jögoroho hebe rovarijeje. Ejögoru mamioho ëho noehu majëhijamu hejarije jöhoje.

<sup>8</sup> Naehu jajivo'irode jögoroho mamieje röhu i'eje. Ejö hesi muoho Kerisohu vaejadoho jemë'o

vaejarujeje. Noro ë muoho garomo uvarueje: Ejöho iae mae höjo. Ehesi bëhoho ramoramo'e muoho rori'o va'anovo'i aji mahuro aevoromo ajivavuë'ego ehuni uvarueje: Ejöho iae mae höjo.

<sup>9</sup> Ae rahu uvë'o'ho: Na God-are aji'ero hi-jaje hö uvo'i röhu hesi Christian ö mueno'o nu huodëgë'o'ho ramoramo'ere hibe rovadoho jaruvohu'o ëhi gemuoho hijajeje.

<sup>10</sup> O hesi Christian ö mueno'o hesi dë vövöbajo'ere uehorovëvë'o'ho God-are aji'ero hiromo uehore ma-maemu jië'ëro ae gö bogo iëmi varijënoho jiajeje.

<sup>11</sup> O hu hesi Christian ö mueno'o nu huodëgë'o'ho ramoramo'ere hiromo ramoramo'e muoho vaebe juvajeje. Ehi'ego ramoramëro nunoho ramoramovahë'ëro öroho sidövajeje.

*Ave sa'a hesi mu sisë bogo uehorovo'iröhe jöhoje.*

<sup>12</sup> Nasi aboji harihu'e God-ro Keriso-are jöëni uehorovoromo jemesi sisëho uehorovoromo vuonugë'ego ehuni na jemesi örire jajive.

<sup>13</sup> A duvahohumë jemë aevo'i jiobe rovade aho gavë'e jëvo'ego ehuni na jemesi örire jajive. A i'ohumë jemëro A Sisëho ruahö'öjë'e jëvo'ego ehuni na jemesi örire jajive.

<sup>14</sup> Nasi aboji harihu'e jemë Vavuoho gavë'e jëvo'ego ehuni na jemesi örire jajive. A duvahohumë jemë aevo'i jiobe rovade aho gavë'e jëvo'ego ehuni na jemesi örire jajive. A i'ohumë jemë biririvoromo God-are jöhuremu jemesi dë vövöbajo'ere uehorovoromo A Sisëho ruahö'öjë'e jëvo'ego ehuni na jemesi örire jajive.

15 Ave sa'a hesi mu sisëho bövioho bise'oho nadi uehorovore. Ave sa'a hesi mu sisë uehorovë'oho jemesi dë vövöbojo'eroho Vavuoho bogo uehorovo'aruje.

16 Sisë rabe rabe nosi sinehu nimaruoho rabe rabe nosi nunehu garomo nimaruoho o noehu ave sa'are raromoromo rabe rabe uehorovoromo döre bamorovaruoho ëho ave sa'a hesi mu sisëje. Ëhi jië'e muoho aho'o bogo Vavu hesirire jioromo rovide muoho jio'i a'i ave sa'a hesi mueje.

17 Sa'a hesi mu sisëho sa'are nimarue bövioho bise'oho barë hesi jio'i a'i ae rahu God-hu nimaje mu vaej'oho bogo barë'i ma-ioro'ioremu raro-marueje.

*Keriso'o muorovarue aribövi jabesi mu sisë avoho goro'iröhe jöhoje.*

18 Nasi aboji harihule sa'a bövi bise'oho barë'iröhe majaho dunove. Ëhesi bëhoho jemë hejarijeje uëvamu: Bövi bise'oho barë'iröhe majaho dunovo'iramu Keriso'o muorovaje aho rue'a'ajëjo. Röhu avevej'oho Keriso'o muorovarue aribövioho aho'obëhe rueruomë'eje. Ëhu'ëro jië'ëro no garomo uvarueje: Bövi bise'oho barë'iröhe majaho dunovajëjo.

19 ËKeriso'o muorovarue ariböviohuro nosi ekaresiaho ramuo va'areje. Röhu urimo jabu no'o raromonövadevaroho jabumë bogo nosi aribövi maehu jioruomadeje. Jabumë nosi aribövi mae jioruomo'ibejo jabumë no'o ëhi raro-moruomo'ibejo. Röhu jabuhu va'arohuro ëhuro no garomo uvarueje: Jabumë bogo ae gemu

vadu'oho nosi aho jië'ëro ëhu'ëro va'oruomade höjo.

<sup>20</sup> A'i jemë Keriso-are Aru'ahoho baej'ëro ëhu'ëro jemë ae aho'obëhe God-are jö maho gavarujeje.

<sup>21</sup> God-are jö maho gavarujego ëhuni na bogo uve: Jemë jö maho dadivëvajeromo ëhunioho röjëhiromo jajive. A'i naehu jajivaje hesi bëhoho jemë jö maho iae gavarujeje. Garomo uvarujeje: Sareri'e jöho bogo God-are jö ma hesi gemuoroho jioromo rovaje höjo. Iae ëhuni jajive.

<sup>22</sup> Sareri sareri ma'e aribövioho rahumëje. Ae rahu jö majahuiromo uövuë'oho: Iesu hu bogo bövie namiromo ajamuaje aho hö uövuë'oho ëhi uövuarue aribövioho Keriso'o muorovarue aribövie jioruome Vavu'o Harihu'o bijönëgaruëro jië'ëro.

<sup>23</sup> Ae rahu Harihu bijönimë'oho Vavuohu'o bijönimoruomajeje. O ae rahu Harihu ejahë'oho Vavuohu'o ejahoruomajeje.

<sup>24</sup> Keriso-are jö aevo'i hebe rovarije jöho uehorovoromo ma'eno titimore. Ehi ë'ë'oho Harihu'o Vavu'o jabesi gemuore raromo'aruje.

<sup>25</sup> Röhu Kerisoro ave suvuoroho bojamui'i mae uövuadeje. Huro uövuadeje: Naro ajëmi'iramu jemë ioro'iore gemu maro raromo'arujëjo.

<sup>26</sup> Jemë sarerëmi'i ë'o gavarue aribövi jabesi jöho naro jemesi örire jajive.

<sup>27</sup> A'i jemë Kerisoro hesi Aru'ahoho bojëmamu jemesi dë vövöbajo'ere abuej'ëro jemë'o hijajeje. Hijë'oho a göho rabëni jemë öroho röjëhi'ë'ö. Bëhe bogoje. God-are Aru'ahohuro hesi muoho

bövioho bise'oho jemë røjëhijajeje. Røjëhiromo bogo sareri'e jöho røjëhi'i jö mae røjëhijajeje. Èhu'e jiaje jemëro hesi Aru'aho hesi jöho eja-horomo Keriso'o gemuoro raromore.

<sup>28</sup> Io'o nasi aboji harihu'ohumë hu'o gemuoro raromore. Èhi ë'ë'oho hu rue'iramu no bogo javo-jimo'i biririvoromo hesi nunire mae riravo'ejo.

<sup>29</sup> Jemëro garomo uvarujeje: Keriso iae a mae höjo. Èhuni uvo'a'aruje: Ae rahu mu mae vaejë'oho God-are aboji harihu'e javuajëjo.

### 3

*Noehu mu sisë vaejaruoho vuonugoromo èhuro God-are aboji harihu'ehu raromaruèhi èhi raromo jjiho 'iröhe jöhoje.*

<sup>1</sup> Asë'e Vavuohuro no mabëhe rajahuijë'eje. Èhi rajahuiromo huro no aboji harihu'e uövüë'eje. Hesi aboji harihu'e uövuadoho iae no javue. God-are aboji harihu'e javuajoho ave sa'are mu sisëhemu uehorovarue ariböviohuro God bogo avoho gavë'ëro èhu'ëro no'o bogo avoho göruomajeje.

<sup>2</sup> Aganomë avevejö'oho no iae God-are aboji harihu'e javue. Ijonö èhi javuoröhoho bogo røjahuijë'ëro no bogo avoho gavö. Röhu no iae garomo uvarueje: No èhi javuoröhoho røjahui'iramu gagorovo Keriso hu diehi jiajoho iae no ga'ejarëjo. Garomo èhuro hu jiajëhi no'o èhi javuo'ajëjo.

<sup>3</sup> Ae rahu uvë'oho: Kerisoro no ajamui'iramu hu jiajëhi no'o èhi javuo'ajë uvë'oho èhuro Keriso ma-maemu jiajëhi èhi jio'i ë'o gavajeje.

4 Ae rahu mu sisë vaejè'oho ëho God bijönimoromo hesi jöho ahajeje. Mu sisë hesi bëhoho ëho God bijönimoromo hesi jö ahaje muohoje.

5 Röhu jemë'o iae gavarujoho Keriso rovade hesi bëhoho nosi sisëho rori'o bava'ego bogojioröhego ëhuni rovadeje. Röhu hesiroho sisëho bogoje.

6 Ëhu'ëro jië'ëro ae rahu Keriso'o gemuore jië'oho bogo birivoromo mu sisëho vaejajeje. Birivoromo mu sisë vaejè'oho hu Keriso bogo ga vadë'ëjeje.

7 Nasi aboji harihu'ohumë ae göehu sarerëmijè'oho nadi ejëhore. Ae rahu mu mae vaejè'oho Keriso mae jiajèhi ëhi jiajeje.

8 O mu sisë birivoromo vaejè'oho ëho Satan-are aeje Satan-ro aevo'i sisë vaebe rov'ëro. Sisë vaebe rue'i God-are Harihehu rovade hesi bëhoho Satan-are muho mu'u'iröhëro ëhuni rovadeje.

9 Ae rahu God-are aboji harihu'e jëvè'oho Vavu örëro jëvè'ëro ëhu'ëro jabumë bogo mu sisëmuoho vaejarueje. God-are aboji harihu'ëro jëvè'ëro mu sisëmu vae'iröhoho jabumë bogo eni jëve.

10 No ave muoho garomo uvarueje: Ëaho God-are harihe o aboje höjo. Ëaho Satan-are harihe o aboje höjo. Ae rahu bogo mu ma vaejè'oho o ö mueno'o bogo dë vövöbajo'ere uehorovëvè'oho ëho bogo God-are aboji harihu'oho jioruome.

*God-hu bojamuade jögore aho'o röhu ö mueno'e uehorovëvo'iröhe jögoru ejahoromo ëhuro hesi aboji harihu'ehu raromaruëhi ëhi raromo'iröhe jöhoje.*



11 Ave jöho jemëhu aevo'i hebe rovarije jöhoje. Noro göëro göho dë vövöbajo'e aho'o uehorovëvo'ejo.

12 Cain-hu ë'adëhioho no bogo ëhioho ë'ejo. Hu A Sisë hesi aëro jië'ëro hesi öho ano bamadeje. Rabëni ëhioho ë'adeje. Hu mu sisëmu vae'i hesi öho mu maemu vaejajego ëhuni ë'adeje.

13 Aganomë ave sa'are mu sisëmu uehorovarue ariböviehu jemë gëromo bijönëgaruoho nadi tiöromo uvore: Diehi'oromo ë'aruëjo.

14 No ave jöho uehorovoromo ëhuro garomo uvarueje: No vuovo öroho vuonugël'ëro i'ovo örire mu javuajëjo ë hesi bëhoho noro Christian ö mueno'o'oho dë vövöbajo'e aho'o uehorovëvaruëro jië'ëro. A'i ae rahu a bogo uehorovëvë'o'oho vuovo örire jijihadoho ëhi jijihajeje.

15 Ae rahu ö mueno'e gëromo bijönimë'o'oho a muo'amarue a jabesi dë vövöbajo'o va'ëne jëvanovajeje. Jemë'o iae garomo uvarujeje: A muo'amaje aho bogo i'ovo öriroho jië'ëro bogo ioro'ioremuoho ma'ho hi hesi höjo.

16 No ave jöho uehorovoromo ëhuro uvarueje: Göëhu gö dë vövöbajo'e aho'o uehorovarue hesi bëhoho ëhi höjo. Kerisoro hesi dë vövöbajo'ere börömo bëhe uehorovavuoromo sinoho bogo juhuonivo'i ajamui'i guomade höjo. Ehuni no'o Christian ö mueno'ëro göëro göho uehorovëvoromo sinoho bogo juhuonivo'i ajëmi'i vuovo'ejo o diehi'o'ejo. Ehni jië'o'oho iae maeje.

17 Ae rahu inöme marohë'e jio'i gal'iröhe hesi Christian ö mueno'o bövie bise'e bogojëvamu gagorovo ma-nunëremu gevë'o'oho hu diehi'oromo

uvo'ë'e: Na God nasi dë vövöbajo'ere uehorovaje höjo.

<sup>18</sup> Nasi aboji harihu'ohumë ë'ego no bogo majö'ëremuoho aho sarerëmiromo uë'iro: Naro jasi örire dë vövöbajo'e aho'o uehorovavaje höjo. A'i ë'ego no ae uehorovëvoromo huë baejëvoromo ajëmi'iro.

<sup>19</sup> Göehu gö dë vövöbajo'e aho'o uehorovëv'oho ëhuro no garomo uvo'ejo: No jö ma ejarue aribövie javuajëjo. Èhi uvoromo God-are nunire riravoromo juhuonivo'i nosi dë vövöbajo'oho sanuamirovo'ejo.

<sup>20</sup> Jö sisë javuë'ëro dë vövöbajo'ere juhuonivë'oho no uvarueje: Nosi arijo'arije ma-bisemu garorovo'i God-ro no iosiramuiromo aho'obëhe gö barëjaje höjo.

<sup>21</sup> Aganomë nosi jö sisëhuni nosi dë vövöbajo'ere bogo juhuonivë'oho God-are nuniro javuoromo biririvoromo mae riravarueje.

<sup>22</sup> Mae riravoromo rabe rabe ua gavë'oho iae hesirire baejarueje rabëni hesi bëhoho hu bojamuade jöho ejahoromo huhu nimaje muoho vaejaruëro jië'ëro.

<sup>23</sup> Huhu bojamuade jöho aviëhije. Huro uövuadeje noro hesi Harihe Iesu Keriso-are ihoho mae uehorovoromo huhu uövuadëhi ëhi göëro göho dë vövöbajo'e aho'o uehorovo'iröhego.

<sup>24</sup> Ae rahu God-are jöe gö gö ejahë'oho God'o gemuoro jio'i God-ro hesi dë vövöbajo'ere hijajeje. Ave jöho uehorovoromo ëhuro uvarueje: God-ro nosi dë vövöbajo'ere hijaje höjo hesi Aru'ahoho bojamuijë'ëro ëhu'ëro.

## 4

*Keriso'o muorovarue aribövi jabesi mu sisëhu'o ave sa'a hesi mu sisëhu'o avoho goro'iröhe jöhoje.*

<sup>1</sup> Aganomë ae göëro göëro sarerivoromo sa'ae dinö'e dinö'e majëhibe jijihoromo uvoruomajeje: No God-are Aru'ahohuro jöho bojamuego majëhijarue höjo. Ëhuni ae göehu ëhi uëvë'o ho avoho gëromogare jabumë mae God-are Aru'ahe baejë'ëro uëvego o hesi aru'ahe gö baejë'e jioruomego.

<sup>2</sup> Ave muoho garomo uvo'a'aruje: God-are Aru'ahëro jöho bojëmego majahuijarue höjo. Ae rahu ae huruoho majëhiromog uëvë'o ho: Iesu Keriso a nosi sino jiajëhi ëhi rovë'e hö uëvë'o ho God-hu bojamuaje Aru'ahoho baeruumë'eje.

<sup>3</sup> O ae rahu Iesuare jö bogo ëhi huruoho majëhijë'o ho ëho bogo God-are Aru'ahoho baeromog majëhi'i a'i Keriso'o muorovaje a hesi aru'ahoho baeromog majëhijarueje. Jemë mami'e hejarijeje uëvamu: Keriso'o muorovaje ahuro rue'a'ajëjo. Röhu avevejö'o ho ë a hesi sareri sareri'e muoho ave sa'are vaeruomajeje.

<sup>4</sup> Hesi sareri sareri'e muoho vaeromog Keriso-are jöho sisë'i majëhijarueje. Iae ëhi ë'arujeje röhu nasi aboji harihu'e jemë God-are ariböviëro jëvë'ëro Keriso-are jö sisë'i majëhijarue aribövi jabesi muoho ruahö'öjë'e jëve. Ëhesi bëhohog jemëro God-are Aru'ahohog bae'i sa'a hesi mu sisë uehorovarue ariböviohuro Satan-are darugohog baeruumë'eje. Röhu God-are Aru'ahog hesi daruge jemesirire jiajohuro Satan-are daruge jabesirire jiajohog iosiramijë'eje. Ëhu'ëro jië'ëro jemëro

Keriso-are jö sisë'i majëhjarue aribövi jabesi muoho ruahö'öjë'e jëve.

<sup>5</sup> Ëaribövioho jabu ave sa'a hesi mu sisë uehorovarue aribövie jioruome. Ëhi jië'ëro ave sa'a hesi jö sisëho atego ave sa'a hesi mu sisë uehorovarue ariböviohuro ejëhoruomajeje.

<sup>6</sup> A'i no ma-God-are ariböviemu javue. Ëhi javuë'ëro ae rahu God gavë'ohuro ëhuro nosi jöho ejahuarueje. Ae rahu bogo God-are aribövi jëvë'oho nosi jöho bogo ejahuarueje. No garöhe di ariböviohuro God-are jö ejahuamu o ave sa'a hesi jö sisë ejëhamu gavë'oho ëhuro uvarueje: Ëho God-are Aru'ahëro jöho bojëmego majahui'i ëho sareri'e aru'aho sisëhuro bojëmego majahuijarue höjo.

*No göehu gö dë vövöbajo'e aho'o uehorovo'iröhe jöhoje.*

<sup>7</sup> Aganomë ë'ego no göëro gö dë vövöbajo'e aho'o uehorovo'iro. Noehu göehu gö ëhi uehorovë'oho ëho God-ro hesi uehoro maho nosi dë vövöbajo'ere bojamuego ë'arueje. God-are aboji harihu'ëro javuë'ëro God mae gavarueje.

<sup>8</sup> O ae rahu ae gö dë vövöbajo'ere bogo uehorovë'oho God bogo ma gavarueje rabëni God-ro dë vövöbajo'e aho'o uehorovemu uehorovavuaje aëro jië'ëro.

<sup>9</sup> Huhu uehorovavuaje muoho aviëhi röjahuijadeje. Harihe gemu'oho sa'are nugö'öjadeje huro i'ovavuego mae raromo'iröhego.

<sup>10</sup> Göehu gö dë vövöbajo'e aho'o uehorovarue mu hesi bëhoho diehije. Noehu God dë

vövöbajo'ere uehorovaroho ëho ma-bise'eje. Ëhuni göehu gö uehorovarue mu hesi bëhoho bogo ëhiohoje. A'i God-ro hesi dë vövöbajo'e aho'o no uehorovavuoromo hesi Harihoho nugö'öjadeje guomego nosi sisëho uehorovoromo vuonugo'iröhëni. Ëho böviohoje. Ëhuni God-hu ëhi no uehorovavuadoho ëho göehu gö uehorovarue mu hesi bëhohoje.

11 Aganomë God-ro börömo bëhe uehorovavuoromo ëhi ajamuijadeje. Ëhuni no göëro göho ëhi uehorovo'ejo.

12 Ae gö nosi nunoho God bogo gavë'e javue. Röhu göehu gö dë vövöbajo'ere uehorovë'oho God-ro nosi dë vövöbajo'ere hiromo hesi uehoro maho bojamuego nosi dë vövöbajo'oho rarovavuaajeje.

13 Ave jöho uehorovoromo ëhuro garomo uvarueje: No God'o gemuoro javuo'i hu nosi dë vövöbajo'ere hijaje höjo. Huro hesi Aru'ahoho bojamuijë'ëro ëhu'ëro.

14 No God-are Harihoho iae nosi nunëro gavë'e javue. Gavë'ëro noro mae majëhiromo ae uëvarueje: Vavuohuro hesi Harihoho nugö'öjade höjo sa'ae dinö'e dinö'e raromarue aribövioho baejëvoromo maro bamëvo'iröhego.

15 Ae rahu huruoho majëhiromo uëvë'oho: Iesu iae God-are Harihe hö uëvë'oho ëhi jië'e aribövi jabesi dë vövöbajo'ere God hi'i jabumë God'o gemuoro jëvajeje.

16 Röhu iae no'o garomo mae uehorovoromo uvë'e javue: God-ro no mabëhe uehorovavuaaje höjo.

God hu dē vövöbajo'e aho'o no uehorovavuaje ahoje. Ëhuni ae rahu ae gö dē vövöbajo'ere uehorovo'i hijë'oho God'o gemuoro jio'i God-ro hesi dē vövöbajo'ere hijajeje.

<sup>17</sup> God-hu hesi uehoro ma nosi dē vövöbajo'ere bojamuego rarovavuaje hesi bëhoho hujeji Kerisohu nosi mu mevo gövuamu no hesi nunire riravë'oho no bogo juhuonivo'i a'i uvoröhego: Keriso jiajëhi no'o sa'are raromoromo ëhi jiobe rovë'e javuajë uvoromo ëhuni avoho biririvoröhego. Ëhuni God-ro hesi uehoro maho bojamuego nosi dē vövöbajo'ere rarovavuajeje.

<sup>18</sup> No herovoromo uvë'oho: God-ro hesi dē vövöbajo'e aho'o uehorovavuaje hõ uvë'oho no bogo hesi öriroho juhuonamijarueje. No herovë'oho God-are uehoro maehu rueromo nosi dē vövöbajo'ere rarovavuamu hejë'oho God juhuonamijaruoho vuonugo'i mae uehorovarueje. Ëhesi bëhoho no God juhuonamijë'oho no uvarueje: God-ro i'ue bojamui hesi höjo. Ae rahu hu juhuonamijë'oho ëhi jië'e aribövioho God-are uehoro maho jabesi dē vövöbajo'eroho bogo rarovëvajeje.

<sup>19</sup> God-hu urimo nosi örire dē vövöbajo'ere uehorovavuadohuro ëhuro no hu'o ae gö'o dē vövöbajo'ere uehorovëvarueje.

<sup>20</sup> Ae rahu uvë'oho: Iae na God-are örire dē vövöbajo'ere uehorovaje hõ uvo'i röhu hesi ö mueno'o gëromo bijönëgë'oho ëho hu ëma sarere uvajeje: Na God uehorovaje höjo. Hesi ö mueno'e nunehu gëvajoho bogo uehorovëvë'oho ëhuro God uehorovo'iröhoho bogo eni jie hu God bogo

nunoho gavajëro jië'ëro.

<sup>21</sup> Èhu'ëro God-ro ave jöho bojamuiromo uövuë'ëje: God nasi örire uehorovevë'o'oho jemesi ö mueno'ohu'o dë vövöbajo'oro uehorovëvorëjo.

## 5

*God-are Harihu mae uehorovo 'iröhe jöhoje.*

<sup>1</sup> Ae rahu mae uehorovoromo uvë'o'oho: Iesu hu böröme namiromo ajamuaje ae hö uvë'o'oho ëhi jië'e aribövioho God-are aboji harihu'e jioruome. Ae rahu vavu dë vövöbajo'ere uehorovë'o'oho ë vavu hesi aboji harihu'ohu'o dë vövöbajo'ere uehorovëvo'anue.

<sup>2</sup> Èhuni no ave jöho uehorovoromo ëhuro iae garomo uvarueje: No God-are aboji harihu'ohu'o dë vövöbajo'ere uehorovëvarue höjo. No God dë vövöbajo'ere uehorovoromo hesi jögoru ejahë'ohuro ëhuro no garomo uvarueje: Hesi aboji harihu'ohu'o uehorovëvarue höjo.

<sup>3</sup> God dë vövöbajo'ere uehorovë'o'oho ëhuro iae no God-are jögoroho ejaharueje. God-are jögoru ejahë'o'oho ëho bogo i'u'ehuje.

<sup>4</sup> God-are aboji harihu'e aho'obëhe sa'are mu sisëho biririvoromo ruahö'öjarueje. Ruahö'ö'iröhe hesi öroho no Iesu mae uehorovaruhuro ëhuro ruahö'öjarueje.

<sup>5</sup> Diehi jië'e ariböviohuro sa'are mu sisëho ruahö'öjarueje. Ae rahu uvë'o'oho: Iesu hu God-are Harihe hö uvë'ohuro ëhi jië'e ariböviohuremu sa'are mu sisëho ruahö'öjarueje.

*God-hu jö mae majahuijego no heromo ëhuro Keriso mae uehorovarue jöhoje.*

<sup>6</sup> Röhu sa'are rovade aho iae Iesu Keriso jiadeje. Ëähuro rueromo jovo maëro bapataeto vaejamu köho rueromo guomadeje. Bogo rueromo ma-bapataeto vaejadohemuje. A'i hu jovo maëro bapataeto vaejamu ijonö hesi köho rueromo guomadeje. Huhu ëhi ë'ade jöho God-are Aru'ahohuro iae mae majahuijajeje ë Aru'ahoho sareroho bogojio'i ma-maemu jië'ëro.

<sup>7</sup> Jöe niö'i gemu no heromo Keriso mae uehorovarueje

<sup>8</sup> Aru'ahuhu majahuijaje jöho jovehu bapataeto vaejade jöho kö rovade jöho. Ëjöho niö'i gemu bëhe gemuhoje. Ëho heromo mae uehorovarueje.

<sup>9</sup> Ma-aëremu jö ma majahuijamu hejë'oho noro ëho mae uehorovarueje. Röhu a jabesi jöho ma-bise'e jio'i God-hu jö mae majahuijajoho ëho börömohoje. Röhu God-ro hesi Harihu hesi jöho ëhi ma-mae majahuijê'eje.

<sup>10</sup> Ae rahu God-are Harihu mae uehorovë'oho ëhuro dë vövöbajo'ere uehorovoromo uvarueje: God-hu hesi Harihu hesi jö majahuijadoho iae mae höjo. O ae rahu God-hu majahuijade jö bogo ma uehorovë'ohuro ëhuro uvoruomajeje: God hu jö sarere jövaje ae höjo. Ëhesi bëhoho God-hu hesi Harihu hesi jö majahuijadoho jaburo bogo ma uehorovaruëro jië'ëro ëhioho uvoruomajeje.

<sup>11</sup> God-hu hesi Harihu hesi jö mae majahuijade hesi bëhoho aviëhije. God-ro darugoho bojamuijê'eje noro baeromo nosi aru'ahoho i'ovoromo ioro'ioremu mae raromo'iröhego. Ëdarugoho God-are Harihu hesirire jie.



12 Ĕhu'ëro ae rahu Harihohu'o gemuore bimuvë'oho ë darugoho baeromo hu'o gemuore mae hijajeje. O bogo God-are Harihohu'o gemuore jië'oho bogo ëhioho maho hijajeje.

*Ioro'io remu mae raromo'iröhëro gavarue jöhoje.*

13 Naehu jemesi örire jajivaje hesi bëhoho jemëro garomo uvo'irarijego: Iae no maro raro-maruoho ëhi ioro'io re gemu raromobe va'ëjarë uvo'irarijego. God-are Harihu mae uehorovaruje aribövioho jemë uëve.

14 Ave jöho uehorovoromo ëhuro no biririvoromo hesi nunire riravoromo jöho majahijarueje. God-hu rabe rabe bojamui'i nimajoho noehu ua gavë'oho iae hu ejahuaajeje.

15 Noehu ua gavë'oho iae ejahuaaje hö uvaruëro jië'ëro ëhu'ëro no uvarueje: No ua gavë'oho bojamuego baejarue höjo.

16 Ae rahuario ga'irane Christian ö mueno'ehu mu sisë vaeromo bogo sisëroho va'o hesi jioruomamu gëvë'oho jero God ua ganego huro jabesi sisëho ajëmiromo daruge bojëmego maro raromo'iro. Na uaromo ë'e mu sisë vaeromo bogo sisëre va'o hesi jio'amaje ariböviohuni God ua ganëjo. A'i mu sisë gö vaejë'oho sisëro va'o hesi javue. Na bogo uave: Jero ëhi jië'e ariböviohuni God ua ganëjo.

17 God-hu bijönimaje muoho aho'obëhe vaejë'oho ëho sisëje. Röhu mu sisë gö vaejë'oho no bogo ëhuro sisëroho va'o hesi javue.

<sup>18</sup> No garomo uvarueje: Ae rahu God-are aboji harihu'e javuë'oho mu sisëho bogo vaemu vaejarue höjo. God-are Harihohuro tugohahuego A Sisëho nosi öriroho bogo ijumavuajeje.

<sup>19</sup> No garomo uvarueje: No God-are aboji harihu'e javuo'i sa'are mu sisë uehorovarue aribövie aho'o jabumë A Sisë hesi darugoro raromarue höjo.

<sup>20</sup> O no garomo uvarueje: God-are Harihohuro rueromo uehoro maho bojamuijë'e höjo ëhuro noro God garöhego God gemu hu mae jiajoho. No hu'o gemuoro javuoromo hesi Harihe Iesu Keriso'o gemuoro javue. Ëaho gemu God mahoje. Huro ajamuego no ioro'iore gemu mae raromarueje.

<sup>21</sup> Nasi aboji harihu'e avoho mueberovore. Nadi uvore: Inöme bövie bise'e masije höromo nuninöho bamo'i God dejonöho bamore. Ahia mino'e.

**God-are Jögoru I'oho**  
**The New Testament in the Omie language of Papua**  
**New Guinea**  
**Nupela Testamen long tokples Omie long Niugini**

copyright © 1991 Wycliffe Bible Translators, Inc.

Language: Ömie (Omie)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 18 Apr 2025 from source files dated 31 Aug 2023

a68769b4-6180-5825-a17e-676d8f6a7efa